

Er möcht noch jnn der welt han gthon
Vil gütts / vnd hett noch grössern lon
Entpfangen / hett er vil gelert
Vnd vff den weg der sellikeyt kert
Dann das er do lyt wie eyn schwyn
Vnd mößst sich jn der zellen syn /
Oder bricht jm sunst so vil ab
Das er keyn freüd noch kurtzwil hab /
Solt / wie er düt / dün yederman
In der Chartuß die kutten an
Wer woltt die welt dann fürbas meren
Wer wolt die lüt wysen / vnd leren /
Es ist gotts will / noch meynnung nit
Das man der welt sich so abschütt
Vnd vff sich selb alleyn hab acht /
Solch red dünt narren tag / vnd nacht /
Die jnn der welt hant als jr teil
Des süchen sie nit selen heyl /
Hör zü / wärst du joch wiß vnd klüg
Es weren dennacht narren genüg
Wañ du schon hettest münchesch gberd
Es weren narren me vfferd /
Wer yederman gesyn din glich
Es wer keyn mensch jm hymelrich /
Wann du joch werst eyn witzig gsell
Es füren dannacht vil zür hell /
Wann ich zwo selen hett jnn mir
Setzt ich lycht eyne den gsellen für
Aber so ich hab eyn alleyn
So muß ich sorg han vmb die eyn
Got hat mit Belyal nüt gemeyn.

